

ES GEIT UM ÖPIS

«Iz längt's»

het si gseit. Het ihri Tasche vom Stuehl, d Jagge vom Haagge u ihres Handy vom Tisch gnoh u isch ohni sech nomau umzdräihe zur Tür us. Tür isch langsam i ds Schloss gheit, nid mau gschletzt het si sä.

U iz hock i am Chuchitisch u starre uf ihres Zigi-Päckli.

Chunnt si äch nomau zrüg?

Steit si äch iz gad dusse vor dr Tür, wott sech uf em Wäg zur Bushautsteu eini azünde u merkt: Shit! I mues nomau zrüg. Aber nach so em ne Abgang nomau zrüg cho, würd ja dr ganz Abgang wider kaputt mache. Würd däm Abgang irgendwie nid grächt wärde. Uf der angere Site würd i nach so em ne Abgang gloub o gärn eini roucke. U i roucke schüsch nid. Aber so ne Abgang het definitiv ä Zigi verdient. Aber nomau bringsch dä Abgang när o nid häre. Das isch när nüm ds Glyche.

Aber villech chunnt si glych nomau zrüg.

Mittlerwiile si scho es paar Minute vergange. Villech steit si immer no dusse vor dr Tür u haderet mit sech säuber. I chönnt eigentlech o schnäu ga luege u we si no da isch, chönnt i ihre ds Zigi-Päckli zuewärfe u öpis cools säge wie:

«du hesch da no öpis vergässe. Aber hey gäu, roucke isch ungsung. No es schöns Läbe, gäu.Tschüss!»

Aber villech het si o eifach es zwöits Päckli ir Tasche. Oder si fragt ar Bushautsteu öper für ne Zigi. Villech isch's gschieder wenn i nid vor d Tür ga.

Si chunnt äua nüm zrüg.

Iz hock i scho ä gschlagni Viertustung am Chuchitisch u starre uf ds Zigi-Päckli. «Rauchen ist tödlich». Ja, was scho nid? Chasch o ds Läbe lang nid roucke u eigentlech topfit si u när mit Sächzgi a Chrebs stärke. Ds Läbe isch tödlich, voilà. Ab em Zytpunkt vo dire Geburt bisch am Tod gnadelos usgliferet. Däm chunnsch nid dervo. Dr Tod isch immer ume. Genau so schnäu wi'd chunnsch, chasch im Fau o wider verschwinde.

Si chunnt definitiv nüm zrüg.

U wiso hock i iz eigentlech hie u danke über e Tod nache? S'isch ja niemer gstorbe. Auso ömu nid gad iz. Auso ömu nid das i wüsst. Nei, iz isch si eifach gange. Gstorbe isch si wäg däm no lang nid. Ömu nid für mi. Ömu nid das i wüsst. Si isch eifach gange u het mi hie am Chuchitisch zrüg glah. Es längi, het si gseit. Aber was het de glängt? Oder het's äbä villech nid glängt? Ha ig villech eifach nid glängt? Scho intressant das zwöi Mönsche stundelang chöi diskutierte u sech Sache vorwärfe u när uf ds Mau längt's öperem. Wi es grosses Glas wo me mit Wasser füut. Mä füut u füut u chuüm isch's vou, überlouft's sofort. Es git kes Derzwüsch. We's vou isch, isch's vou.

U da chasch di när scho frage, wiso das es eifach plötzlech längt. Wiso das iz genau das einte Wort z'viu isch gsi. U da fragsch di när o, wiso das es de gad das Wort isch gsi. Da hocksch äbä de när ä Stung am Chuchitisch u nachdäm di dermit hesch abgfunge, dass si hüt nüm zrüg chunnt, fragsch di äbä de.

Wiso das Wort? U isch's überhoupt das Wort gsi? Es si tuusegi Wörter gfaue u genau bi eim söus när eifach glängt ha? U du masch di eigentlech o gar nüm so richtig dra erinnere weles Wort das es iz isch gsi.

I griiffe nach ihrem Zigi-Päckli, stah uf u ga uf e Baukon. Ihres Füürzüüg isch o im Päckli. Es Wärbegschänk vo irgend so re Garage. Ds het si ganz sicher mau usglehnt u när nie meh wider zrüggäh. I nime ä Zigi, zünde se ah, nime ä Zug u muess sofort hueste. Isch ja eigentlech o klar gsi.

Wiso muesch iz eini roucke? S'isch ihre Abgang gsi u nid dine. Du hättsch dr o chönne es Bier uftueh oder direkt i Schnaps gah, aber roucke hesch no nie chönne. I drücke d Zigi us u luege aben uf d Strass. Dr Bus hautet. Niemer stiigt us. Niemer stiigt iih.

Mängisch brucht's eifach eis fautsches Wort für öpis kaputt z'mache. Eis einzigs Wort. U vo däm Wort weiss me haargenau das es fautsch isch. Mä weiss es no bevor me's usspricht. Mä zögeret, mä wägt ab u schliesslech seit me's glych. U chuume hei sech die paar Buechstabe zu däm Wort gformt u das Wort isch usetroolet, merkt me: Shit! I ha doch gwüsst das es fautsch isch.

Aber villech si ja di angere Wörter wo me vorhär gseit het o nid per se richtig gsi. Au di tuusige Wörter wo me sech gägesittig het a Chopf gworfe, si ja villech o scho fautsch gsi. U villech isch's gar nid das einte fautsche Wort gsi, wo öpis het kaputt gmacht, sondern es isch aues scho kaputt gsi. Wi d'Kamera wo'd vo dim Kolleg uslehnsch u när plötzlech nüm geit u du hesch es schlächts Gwüsse u biichtisch ihm dass sini Kamera kaputt isch u är när seit:

«kes Ding, di isch scho vorhär kaputt gsi».

Villech isch ds einte fautsche Wort auso eifach nume no das Wort wo när äbä derzue fñhrt das es längt.

I due ds Fñürzüüg wider zrug i ds Päckli, ga ine u versorge's ir oberste Chuchi-Schubblade. Chönnt ja si das si's irgendeinisch wider brucht.

I hocke zrüg a Chuchitisch, luegen uf's Handy. Nume d Sport-App mäudet sech mit de bestätigte Ufstellige vom Europa League Gruppespü. Napoli gäge San Sebastián. Muess me iz o nid unbedingt gseh ha. Aber isch villech o chly fautsch so z'dänke. Villech wird's es riise Spü. Immerhin geit's um öpis.

I frage mi, um was es eigentlech gnau isch gange. I cha mi gar nüm dra erinnere, was die Diskussion het usglööst wo schliesslech derzue het gfñhrt, dass si isch ufgstange u gange.

U i frage mi immer no weles Wort äch das einte fautsche Wort isch gsi. I probiere au di angere tuusige vo Wörter nomau i mim Chopf düre z'gah. Villech si die o fautsch gsi, aber das einte chlyne Wort isch eifach no chly fautscher gsi. Aber wo söu dert dr

Ungerschid si? Wes scho zwüsche richtig u fautsch verdammt wehni Spiuruum het, cha zwüsche fautsch u fautscher iz o nid so viu spatzig si. Fautsch isch eifach fautsch u aus was drüber isch, duet o nüm viu zur Sach. Aus was drüber isch, duet eifach no weh.

Uf das chasch eigentlech gah, dänk i. Schmäärz isch öpe genau so zueverlässig wi dr Tod. Wed öperem wosch ä Fröid mache, chasch dir nie zu Hundert Prozänt sicher si, öb die Person de o tatsächlech Fröid drann wird ha. Villech het si das Buech scho, villech isch si allergisch uf Rose, villech isch si das Jahr scho drümau im Europa Park gsi. Bim ne fautsche Wort hingäge, wo'd scho bevor's ussprichsch weisch, das es fautsch isch, chasch druf gah das es wird weh tue.

«Iz längt's»

säg i liisli aber bestimmt vor mi häre, stah uf, nime ds Zigi-Päckli us dr Chuchi-Schubblade u schiess es i Küder. När lahn i dr Fernseh ah u luege di zwöiti Haubzyt Napoli gäge San Sebastián. Schliesslech geit's um öpis.